

DEMOKRAZIA: REQUIESCAT IN PACE



Rudi Dutschke

ren jabearen kontra izan zan batezbe protesta ori; baiña Axel Springer'en atzetik demokrazia dagoala, ez dago ez ikusterik: askatasunaren kontzeptua, politikea, oposiziño sistema, *establishment* berbeagaz kondenatuten dan guztia.

POLITIKEA

Estudianteen gorabeerak mundu guztian dagoz modan, zelanbait esateko. Baiña ez da moda utsa. Emen bearbada iñun baiño obeto ikusi daikenez, gure munduaren komedia da: industria bat altxatu daben gure aurreko generaziñoak ez dabela gizonaren moralik altxatu. Eta galtzairuzko kortiñearen alde batetik naiz bestetik, orrekek sortu dau deskontentua. Montatuta daukogun gizartearen erakundea ez da siñisgarri, ez da morala.

Politikea falta da, berba au griegoak ulertuko leukeen zentzunean. Erria zainduteko ardura ta posibilidadade benetakoak falta dira. Eta Alemaniak, gerra ostein, ez dau sekula politikarako posibilidadaderik ezagutu. Eta orain be, orixe gertatu da. Baiña oraingoa Aste Santuan asi zan, eta kalbario bat biurtu da. Politikearen ordez, alde batetik ideologia, fanatismoa, protesta ta desordenua; eta beste aldetik histeria, egurkadak, poliziaren indarra ta porrak. «Tranquilidad viene de tranca» esaten eben bromistak leenago. Eta oraingoa, orixe egin dabe aleman serioak.

Nazismotik urtendako Alemanian, krimen politiko batek asko esan gura dau. Baiña askoz geiago esan gura dau, krimen orren ostein gobernua burua galtzen badau. Askoz geiago esan gura dau, bakean protestetan daben estudianteari poliziak porrazoka erasoten badeutse. Eta etxeetako zibillak manifestanteen kontra txakurrak jaregiten badabaz. Eta poliziak informaziñoa galerazoten badau. Arrazoi guztiagaz lamentatu da Londreseko *Times*: «Demokratikoa esaten dan Estadu baten, kaleko manifestaziñoak poliziaren indarkeria barik ordenamentuan egin leitekezala itxaron bear litzake».

AXEL SPRINGER

Periodiko askotan, gure artean —Españiakoetan esan gura dot—, Axel Springer gizon aberats bat baiño besterik ez balitz lez itz egin deuskue. Baiña ez dabe esaten, Berlingo periodikoen merkantuan euneko irurogetamarra (70 %) Springer'en eskuetan dagoala. Ez dabe esaten, Alemaniako amasei milloi periodiko-irakurle Axel Springer'en jabetza pribadua biurturik dagozala. Domeketako periodikoetatik euneko larogetazortzia (88 %) arena dala. Kalean saltzen diran periodikoetatik euneko larogetabata (81 %) be bai. Ez dabe esaten, azkenengo amar urteotan Alemaniako periodisten Alkartasunak alperrik protestatu dauala orren kontra. Eta ori guztia ez dala demokrazia, erri eritxiaren manipulaziño mixerable utsa baiño.

Erri eritxia manipulatu edo falsifikatu dagoan errian, ez dago askatasunaz mintzaterik. Eta ori libertadearen izenean egiten danean, libertadearen limitaziñoa da egiazko libertadearen garantia bakarra. Alperrik eskatuten dau periodisten Alkartasunak, enpresario baxotxaren poderioa periodiko guztien euneko amarrera (10 %) laburtuteko. Axel Springer'en periodiko batek bakarrik, *Bild* periodikoak, eguneroko guztien euneko ogeia (20 %) egiten dau. Eta emetzi periodiko ta astekari daukoz Springer'ek!

SDS DEBEKATUTA?

Protesta au guztia, SDS estudiante sozialisten Alkartasunak moldatu dau, metodo zantarragaz baiña asmo zuzenagaz be bai. Denak dakie, gauza asko ez dabizala ondo SDS Alkartasunean. Baiña orain zurrumurrua zabaldu da, dabekatu egin gura dabela Alkartasun ori be. Orixe da errezena. «Legalidadearen» izenean jokatuten dabenak naikoa dala uste dabe, oposiziño talde bat «legalidade» orretatik kanpoan ixtea. Olantxe egiten da, izan be, eskuak ezetarako loitu barik: «egiak eta beti egiak esanaz», guzurra zabaldu.

Demokraziak bere burua defenditzeko totalitarismoaren metodoak erabili bear badauz, oba da gauzak klaru esan eta ez iñor engeñiatu. Eta ba dirudi, demokraziak bere buruaren suizidioa dekretatu gura dauala Alemanian. Azkenean egia izango da Nietzsche'k esaten ebana: «Alemanak atzoa ba dauke, birra be bai ba dauke, baiña gaurrik ez dabe bapere».

NOR NOR DAN

- **RUDI DUTSCHKE**: erreboluziñoaren sinboloa. anarkiaren sinboloa. askatsun totala gura daben buruzagia ta demagogoa. Mao ta Che Guevara profetak estudiatzen dituana, ta semeari Che izena emon deutsona. eta alemanak jasan ezin dabena. Alemania komunistatik federalera iges egindakoa. Eguen Santuan iru tirok jota, hospitalean dago.
- **JOSEF BACHMANN**: estudianteari tiroak jo deutsozana. sinbolo bat. komunismo izena bera entzun orduko, umorea galtzen dauana. guztiaren gaiñetik ordenean, garbitasuna ta demokrazia gura dituana. baiña «bere» demokrazia. bere kuartuan Hitler eta Napoleonen irudiak eskegita daukozana, eta Españiako ezpata bi ta Valenciako korrida irudi bat. eta Alemania komunistatik federalera iges egindakoa. Poliziagaz tiroka jardun ostein, tiro bik jota, hospitalean dago au be.

Rudi Dutschke ta *Josef Bachmann*, aren asesinoa, biak hospital baten dagoz. Biak doguz gurasoen etxetik aldegiñak. Eta azkenekoa, Bachmann, sasikume esaten danetakoa. Biak doguz gizarte demokratiko esaten danaren frutu tipiko. Espartanoak biak: ez edan, ez erre. Ta gurasoen mundua gorrotatzen dabenak. Diru falta barik, eta ijituen moduan bizitza atsegiñago dabenak.

JOSE AZURMENDI